

四庫全書

史部

欽定四庫全書

史部  
明史卷六十五  
三至五

內閣中書<sub>臣</sub>瞿<sub>照</sub>復勘

總校官編修<sub>臣</sub>朱鈐

欽定四庫全書

明史卷六十三

大學士張廷玉等奉勅修

志第三十九

樂三

樂章二

洪武三年定朝賀樂章陞殿奏飛龍引之曲百官行禮  
奏風雲會之曲丞相致詞奏慶皇都之曲復位百官行

禮奏喜昇平之曲還宮奏賀聖朝之曲俱見後宴饗九  
奏中

二十六年更定陞殿韶樂奏聖安之曲 乾坤日月明

八方四海慶太平龍樓鳳閣中扇開簾捲帝王興聖感  
天地靈保萬壽洪福增祥光王氣生陞寶位永康寧

還宮韶樂奏定安之曲 九五飛聖龍千邦萬國敬依

從鳴鞭三下同公卿環珮響玳瑁掌扇護御容中和樂

音呂濃翡翠錦繡擁還華蓋赴龍宮

公卿入門奏治安之曲 忠良為股肱昊天之德承主

恩森羅拱北辰御爐烟遶奉天門江山社稷興安天下

軍與民龍虎會風雲

後不用

洪武二十六年定中宮正旦冬至千秋節朝賀樂章

中宮天香鳳韶之曲 寶殿光輝晴天映懸玉鉤珍珠

簾櫳瑤觴舉時簫韶動慶大筵來儀鳳昭陽玉帛齊朝

貢讚孝慈賢助仁風歌謠正在昇平中謹獻上齊天頌

宣德以後增定慈宮朝賀樂章天香鳳韶之曲 龍樓

鳳閣彤雲曉開繡簾天香芬馥瑤堦春暖千花簇壽聖  
母齊頌祝御筵奏獻長生曲坤道寧品類咸育和氣四  
時調玉燭享萬萬年太平福

洪武三年定宴饗樂章

一奏起臨濠之曲名飛龍引千載中華生聖主王氣  
成龍虎提劍起淮西將勇師雄百戰收彊虜驅馳鞍  
馬經寒暑將士同甘苦次第靜風塵除暴安民功業如  
湯武

二奏開太平之曲名風雲會 玉壘瞰江地風雲繞帝  
營駕樓船龍虎縱橫飛礮發機驅六甲降虜將勝胡兵  
談笑掣長鯨三軍勇氣增一戎衣宇宙清寧從此華  
夷歸一統開帝業慶昇平

三奏安建業之曲名慶皇都 虎踞龍蟠佳麗地真主  
開基千載風雲會十萬雄兵屯鐵騎臺臣守將皆奔潰  
一洗煩苛施德惠里巷謳歌田野騰和氣王業宏開  
千萬世黎民咸仰雍熙治

四奏削羣雄之曲名喜昇平 持黃鉞削平荆楚清吳  
越清吳越暮秦朝晉幾多豪傑 幽燕齊魯風塵潔伊  
涼蜀隴人心悅人心悅車書一統萬方同轍

五奏平幽都之曲名賀聖朝 天運推遷元運移王師  
北討定燕畿百年禮樂重興日四海風雲慶會時 除  
暴虜撫瘡痍漠南爭覩舊威儀君王聖德容降虜三恪  
衣冠拜玉墀

六奏撫四夷之曲名龍池宴 海波不動風塵靜中國



有真人文身交趾種裘金齒重譯來賓 奇珍異產梯  
山航海奉表稱臣白狼元豹九苞丹鳳五色麒麟

七奏定封賞之曲名九重歡 乾坤清廓論功定賞策  
勲封爵玉帶金符貂蟬簪珥彤圖麟閣 奉天洪武功  
臣佐興運文經武略子子孫孫尊榮富貴久長安樂

八奏大一統之曲名鳳凰吟 大明天子駕飛龍開疆  
宇定王封江漢遠朝宗慶四海車書會同 東夷西旅  
北戎南越都入地圖中遐邇暢皇風億萬載時和歲豐

九奏守承平之曲名萬年春 風調雨順遍乾坤齊慶  
承平時節玉燭調和甘露降遠近桑麻相接偃武修文  
報功崇德率土皆臣妾山河磐固萬方黎庶歡悅 長  
想創業艱難君臣曾共掃四方豪傑露宿宵征鞍馬上  
歷盡風霜冰雪朝野如今清寧無事任用須賢哲躬勤  
節儉萬年同守王業

以上九奏前三奏和緩中四奏壯烈後二奏舒長其曲皆按月律

十二月按律樂歌

正月太簇本宮黃鍾商俗名大石曲名萬年春 奉天

承運秉黃麾志在安民除慝曾覩中天騰王氣五色虹  
霓千尺龍繞兜鍪神迎艘艦嘉應非人力鳳凰山上慶  
雲長繞峯石天助神武成功人心效順所至皆無敵  
手握乾符開寶祚略定山河南北飲馬江淮列營河漢  
四海風波息師雄將猛萬方齊仰威德

二月夾鍾本宮夾鍾宮俗名中呂曲名玉街行山林  
豺虎中原狐兔四海英雄無數大明真主起臨濠震於  
赫戎衣一怒星羅玉壘雲屯鐵騎一掃乾坤烟霧黎

民重覩太平年慶萬里山河磐固

三月姑洗本宮太簇商俗名大石曲名賀聖朝 雲氣

朝生芒碭間虹光夜起鳳凰山江淮一日真主出華夏

千年正統還 瞻日角覩天顏雲龍風虎競追攀君臣

勤苦成王業王業汪洋被百蠻

四月仲呂本宮無射徵俗名黃鍾正徵曲名喜昇平

風雲密濠梁千載真龍出真龍出鯨鯢豺虎掃除無迹

江河從此波濤息乾坤同慶承平日承平日華夷萬

里地圖歸一

五月蕤賓本宮姑洗商俗名中管雙調曲名樂清朝  
中原鹿走英雄起回首四郊多壘英主倡兵淮水將士  
皆雄偉百靈護助人心喜一呼萬人風靡談笑掃除  
蝼蟻王業從茲始

六月林鍾本宮夾鍾角俗名中呂角曲名慶皇都王  
氣呈祥飛紫鳳虎嘯龍興千里旌旗動四海歡呼師旅  
衆天戈一指風雲從將士爭先民樂用駕馭英雄聖

德皆天縱率土華夷歸職貢詞臣拜獻河清頌

七月夷則本宮南呂商俗名中管商角曲名永太平

鳳凰佳氣好王師起義乾坤初曉淮水西邊五色慶雲

繚繞三尺龍泉似水更百萬貔貅熊豹軍令悄魚麗鵝

鶴風雲蛇鳥糾糾電掣鷹揚在伐罪安民去殘除暴

天與人歸豪傑削平多少萬里煙塵淨洗正紅日一輪

高照膺大寶王業萬年相保

八月南呂本宮南呂宮俗名中管仙呂曲名鳳凰吟

紫微翠蓋擁蓬萊聖天子帝圖開歷數應江淮看五色  
雲生上台 櫛風沐雨攻堅擊銳將士總英才躍馬定  
塵埃創萬古山河壯哉

九月無射本宮無射宮俗名黃鍾曲名飛龍引詞同前  
起臨濠之曲

十月應鍾本宮姑洗徵俗名中呂正徵曲名龍池宴

大明英主承天運倡義擁天戈星辰旋繞風雲圍護龍  
虎麾訶 旌旗所指羗夷納款江海停波從今平定萬

年疆宇百二山河

十一月黃鍾本宮夷則角俗名仙呂角曲名金門樂

慶皇都聖主開寶祚起臨濠正汝穎塵飛江淮浪捲赤

子呼號天戈奮然倡義擁神兵百萬總英豪貌虎朝屯

壁壘虹霓夜繞弓刀鳳凰山勢聳層霄佳氣五雲高

愛士伍同心君臣協力不憚勤勞風雲一時相會看魚

龍飛舞出波濤靜掃八方氛祲咸聽九奏簫韶

十二月大呂本宮大呂宮俗名高宮曲名風雲會天



眷顧淮西真人起布衣正乾剛九五龍飛駕馭英雄收  
俊傑承永命布皇威一劍立鴻基三軍擁義旗望雲  
霓四海人歸整頓乾坤除暴虐歌聖德慶雍熙

武舞曲名清海宇拔劍起淮土策馬定寰區王氣開

天統寶厯慶乾符武畧文謨龍虎風雲創業初將軍星  
繞升勇士月彎弧選騎平南楚結陣下東吳跨蜀驅胡  
萬里山河壯帝居

文武曲名泰階平乾坤清寧治功告成武定禍亂文

致太平郊則致其禮廟則盡其誠卿雲在天甘露零風  
雨時若百穀登禮樂雍和政刑肅清儲嗣既立封建乃  
行讒佞屏四海賢俊立朝廷玉帛鐘鼓陳兩楹君臣賡  
歌揚頌聲

四夷舞曲 其一小將軍大明君定宇橐聖恩寬掌江  
山東虜西戎北狄南蠻手高擎寶貝盤 其二殿前歡  
五雲宮闕連霄漢金光明照眼玉溝金水深潺潺頤  
觀趨蹌看儀鑾嚴肅百千般威人心膽寒 其三慶新

年虎豹闕文武班五綵間慶雲朝霞燦黃金殿喜氣增  
丹墀內仰聖顏翠繞紅圍錦繡班高樓十二欄笙簫赴  
紫壇仙音韻瑤箏按拜舞齊歌謠讚吾皇萬壽安 其  
四過門子定宇寰定宇寰掌江山撫百蠻謳歌拜舞仰  
祝讚萬萬年帝業安

洪武十五年重定宴饗九奏樂章

一奏炎精開運之曲 炎精開運篤生聖皇大明御極  
遠紹虞唐河清海宴物阜民康威加夷獠德被戎羌八

珍有薦九鼎馨香鼓鐘鐃鐃宮徵洋洋怡神養壽理陰  
順陽保茲遐福地久天長

二奏皇風之曲 皇風被八表熙熙聲教宣時和景象  
明紫宸開繡筵龍袞曜朝日金爐裊祥烟濟濟公與侯  
被服麗且鮮列坐侍丹宸磬折在周旋羔豚升華俎玉  
饌充方圓初筵奏南風繼歌賡載篇瑤觴欣再舉拜俯  
禮無愆同樂及斯辰於皇千萬年

奏平定天下之舞曲名清海宇

同前

三奏眷皇明之曲 赫赫上帝眷我皇明大命既集本  
固支榮厥本伊何育德春宮厥支伊何藩邦以寧慶延  
百世澤被羣生及時為樂天祿是膺千秋萬歲永觀厥  
成

奏舞安四夷之舞曲名小將軍殿前歡慶新年過門子

前  
俱同

四奏天道傳之曲 馬負圖兮天道傳龜載書兮人文  
宣義畫卦兮禹疇叙皇極建兮合自然綿綿厯數歸明

主祥麟在郊威鳳舞九夷入貢康衢謠聖子神孫繼祖  
武垂拱無為邁前古

奏車書會同之舞曲名泰階平

同前

五奏振皇綱之曲 周南詠麟趾卷阿歌鳳凰藹藹稱

多士為楨振皇綱赫赫我大明德尊踰漢唐百揆修庶  
績公輔理陰陽我冠正襟佩都兪在高堂坐令八紘內  
熙熙民樂康氣和風雨時田內見豐穰獻禮過三爵歡  
娛良未央

六奏金陵之曲

鍾山蟠蒼龍石城踞金虎千年王氣

都於今歸聖主六代繁華經幾秋江流東去無時休誰  
言天塹分南北英雄豈但嗤曹劉我皇昔住濠梁屋神  
遊天錫真人服提兵乘勢渡江來時臣早獻金陵曲歌  
金陵進珍饌諧八音繼三歎請觀漢祖用兵時為嘗馮  
異滹沱飯

七奏長楊之曲

長楊曳綠黃鳥和鳴菡萏呈鮮紫燕

輕盈千花浥露日麗風清及時為樂芳尊在庭管音嘒

嘒絲韻泠泠玉振金聲各奏爾能皞皞國老載勸載懲  
明德惟馨垂之聖經唐風示戒永保嘉名無已太康哲  
人是聽

八奏芳醴之曲 夏王厭芳醴商湯遠色聲聖人示深  
戒千春垂令名惟皇登九五玉食保尊榮日昃不遑餐  
布德延羣生天庖具豐膳鼎鼐事調烹豈但資肥甘亦  
足養遐齡達人悟茲理恒令五氣平隨時知有節昭哉  
天道行



九奏駕六龍之曲 日麗中天漏下遲公卿侍宴多令  
儀簫韶九奏觴九獻爐烟細逐祥風吹羣臣舞蹈天顏  
喜歲熟民康常若此六龍迴駕鳳樓深寶扇齊開扶玉  
几景星呈瑞慶雲多兩曜增暉四序和聖人道大如天  
地歲歲年年奈樂何

進膳曲水龍吟 寶殿祥雲紫氣濛聖明君龍德宮氤  
氲霧靄檜栢間青松龍樓鳳閣雕梁畫棟此是蓬萊洞  
太平清樂曲太清歌 萬國來朝進貢仰賀聖明主一

統華夷普天下八分四海南北東西託聖德勝堯王保  
護家國太平天下都歸一將兵器銷為農器旌旗不動  
酒旗招仰荷天地 上清歌 一願四時風調雨順民  
心喜攝外國將寶貝攝外國將寶貝見君王來朝寶殿  
裏珊瑚瑪瑙玻璃進在丹墀 開天門 託長生日月  
光天德萬萬歲永固皇基公卿文武來朝會開玳筵捧  
金盃

迎膳奏水龍吟曲與進膳同陞座還宮百官行禮奏萬

歲樂朝天子二曲與朝賀同

大祀慶成大宴用萬國來朝隊舞 纓鞭得勝隊舞

萬壽聖節大宴用九夷進寶隊舞 壽星隊舞

冬至大宴用讚聖喜隊舞 百花聖朝隊舞

正旦大宴用百戲蓮花盆隊舞 勝鼓采蓮隊舞

永樂十八年定宴饗樂舞

一奏上萬壽之曲 龍飛定萬方受天命振紀綱彝倫

攸叙四海康普天率土盡來王臣民舞蹈嵩呼載揚稱

觴奉吾皇聖壽天長

平定天下舞曲 其一  
四邊靜威伏千邦  
四夷來賓納表章  
顯禎祥承乾象  
皇基永昌萬載山河壯  
其二  
刮地風聖主過堯舜  
禹湯立五常  
三綱八蠻進貢朝  
今上頓首誠惶  
朝中宰相變理陰陽  
五穀收成萬民歡暢  
賀吾皇齊讚揚萬國來降

二奏仰天恩之曲  
皇天眷聖明  
五辰順四海  
寧風調雨順  
百穀登  
臣民鼓舞樂  
太平賢良在位  
邦家永禎吾

皇仰洪恩夙夜存誠

黃童白叟鼓腹謳歌承應曲曰豆葉黃  
雨順風調五穀收成倉廩豐盈大利民生託賴著皇恩四海清鼓腹謳歌白叟黃童共樂咸寧

四夷舞曲 其一小將軍順天心聖德誠化番邦盡朝  
京四夷歸伏舞於龍廷貢皇明寶貝擎 其二殿前歡  
四夷率土歸王命都來仰大明萬邦千國皆歸正現帝  
庭朝仁聖天階班列衆公卿齊聲歌太平 其三慶豐

年和氣增鸞鳳鳴紫霧生祥雲朝霞映熱金爐香味馨  
列丹墀御駕盈絃管簫韶五音應龍笛間鳳笙 其四  
渤海令金盃中酒滿盛御案前列羣英君德成皇圖慶  
嵩呼萬歲聲 其五過門子聖主興聖主興顯威靈蠻  
夷靜至仁至德至聖明萬萬年帝業成

三奏感地德之曲 皇心感地靈順天時德厚生含宏  
光大品物亨鍾奇毓秀產俊英河清海宴麟來鳳鳴陰  
陽永和平相我文明

車書會同舞曲 其一新水令錦衣花帽設丹墀俱公  
服百司同會麟至舞鳳來儀文武班齊朝賀聖明帝

其二水仙子八方四面錦華夷天下蒼生仰聖德風調  
雨順昇平世遍乾坤皆讚禮託君恩民樂雍熙萬萬年  
皇基堅固萬萬載江山定體萬萬歲洪福天齊

四奏民樂生之曲 世間的萬民荷天地感聖恩乾坤  
定位四海春君臣父子正大倫皇風浩蕩人心載醇熙  
熙樂天真永戴明君

表正萬邦舞曲 其一慶太平奸邪濁亂朝綱構禍難  
煽動戈斨赫怒吾皇親征灞上指天戈敵皆降 其二  
武士歎白溝戰場旌旗雲合迷日光令嚴氣張三軍踴  
躍齊奮揚掃除殘甲如風蕩凱歌傳四方仁聖不殺降  
望河南失機槍 其三滾綉毬肆旅拒恃力强一心構  
殲築滄洲百尺城隍騁薑毒恣虎狼孰能禦當順天心  
有德隆昌倒戈歛甲齊歸降撫將生還達故鄉自此仁  
聞愈彰 其四陣陣羸不數孫吳兵法良神謀睿算合



陰陽八陣堂堂行天上虎略龍韜孰敢當俘囚十萬皆  
疎放感荷仁恩戴上蒼其五得勝回兩傍四方展鳥  
翼風雲雁行出奇兵敵難量士強馬強過百里眠旌卧  
鎗勝兵回樂洋洋其六小梁州敵兵戰敗神魂喪擁  
貔貅直渡長江開市門肆不移宣聖恩如天曠綸音頒  
降普天下仰吾皇

五奏感皇恩之曲當今四海寧頌聲作禮樂興君臣  
慶會躋太平衣冠濟濟宴彤庭文臣武將共荷恩榮忠

心盡微誠仰答皇明

天命有德舞曲 其一慶宣和雨順風調萬物熙一統  
華夷四海嘉禾感和氣一榦百穗一榦百穗 其二窄  
輒兒梯航萬國來丹陛太平年永固洪基正東西南北  
來朝會洽寰宇布春暉四夷咸賓聲教美自古明王在  
慎德不須威武服戎狄祥瑞集鳳來儀佳期萬萬歲聖  
明君主華夷

六奏慶豐年之曲 萬方仰聖君大一統撫萬民豐年

時序雨露均穰穰五穀貨財殷酣歌擊壤風清俗淳四  
夷悉來賓正統皇仁

七奏集禎應之曲 皇天眷大明五星聚北斗太平騶虞  
出現甘露零野蠶成繭嘉禾生醴泉湧地河水清乾坤  
萬萬年四海永寧

八奏永皇圖之曲 天心眷聖皇正大位撫萬邦仁風  
宣布禮樂張戎夷稽首朝明堂皇圖鞏固賢臣贊襄太  
平日月光地久天長

九奏樂太平之曲 皇恩被八紘三光明四海清人康  
物阜歲屢登含哺鼓腹皆歡聲民歌帝力唐堯至仁乾  
坤永清共樂太平

導膳迎膳進膳及陞坐還宮百官行禮諸曲俱與洪武  
間同

大祀慶成用纓鞭得勝蠻夷隊舞萬壽聖節九夷進寶  
隊舞冬至節讚聖喜隊舞正旦節百戲蓮盆隊舞  
嘉靖間續定慶成宴樂章

陞座樂曲萬歲樂 五百昌期嘉慶會啟聖皇龍飛天  
位九州四海重華日天明朝萬萬世

百官行禮樂曲朝天子 滿前瑞烟香繞蓬萊殿風回  
韶律鼓淵淵列陞上旌旗絢日至朱躔陽生赤甸氣和  
融徹上元歷年萬千長慶天宮宴

上護衣上花樂曲水龍吟 寶殿金爐瑞靄浮陳玉案  
列珍羞天花炫彩照耀翠雲裘鸞歌鳳舞虞廷樂奏萬  
歲君王壽

一奏上萬歲之曲 聖主垂衣裳興禮樂邁虞唐蕭韶  
九成儀鳳凰日月中天照八荒民安物阜時和歲康上  
奉萬年觴允祚無彊

奏平定天下舞曲 其一四邊靜天啟嘉祥聖主中興  
振紀綱頌洋洋功蕩蕩國運隆昌萬歲皇圖壯 其二  
鳳鸞吟維皇上天佑聖明景命宣五雲輝三台潤七緯  
光懸協氣生嘉祥見正萬民用羣賢垂袞御經筵宵衣  
勤政殿禮園丘大祀精虔明水潔蒼壁圓東周文承殷

薦眷皇家億萬斯年

二奏仰天恩之曲 皇穹啟聖神欽乾運祗郊禋一陽  
初動霽先春萬福來同仰至神祥開日月瑞見星辰禮  
樂協神人宇宙咸新

迎膳曲水龍吟 春滿雕盤獻玉桃葭管動日輪高熹  
微霽色遙映袞龍袍千官舞蹈鈞韶迭奏曲度昇平調  
進膳曲水龍吟 紫禁瓊筵暖應冬驂八螭乘六龍玉  
卮瓊觴黼座獻重瞳堯天廣運舜雲飛動喜聽賡歌頌

進湯曲 其一太清歌長至日開黃道喜乾坤佳氣陽  
長陰消奏鈞韶音調鳳軫律協鸞簫仰龍顏天日表如  
舜如堯金爐烟煖御香飄玉墀晴霽祥光繞宮梅苑柳  
迎春好燕樂蓬萊島 其二上清歌雲捧宸居五星光  
映三台麗仰日月層霄霽仰日月層霄霽中興重見唐  
虞際太和元氣自陽回兆姓歡愉 其三開天門九重  
霄日月皇州曉宴天家共歌魚藻龍麟雉尾高祝聖壽  
慶清朝



奏黃童白叟鼓腹謳歌承應曲御鑾歌 雅奏樂昇平  
瞻絳闕集瑤京黃童白叟喜氣盈謳歌鼓舞四海寧金  
枝結秀玉樹含英聽康衢擊壤聲帝力難名

三奏感昊德之曲 帝德運光明一陽動萬物生升中  
大報蒼壁陳禮崇樂暢歆太清星懸紫極日麗璇庭乾  
坤瑞氣盈海宇安寧

奏撫安四夷舞曲 其一賀聖朝華夷一統萬國來同  
獻方物修庭貢遠慕皇風自南自北自西自東望天宮

佳氣鬱重重四靈畢至麟鳳龜龍 其二殿前歡瑞雲

晴靄浮宮殿一脈陽和轉禮成交泰開周宴鳳笙調龍

幄展天心感格人歡忭四海謳歌徧 其三慶豐年賴

皇天錫豐年勤禹稼力舜田喜慰三農願嘉禾秀瑞麥

鮮賦九州貢八埏神倉御廩咸充滿養民以養賢 其

四新水令聖德精裡格昊穹大一統四夷來貢玉帛捧

文軌同世際昌隆共聽輿人頌 其五太平令誕明裡

天鑒元后光四表惠澤周流來四夷超前擁後獻萬寶

充庭滿園稽首頓首天高地厚祝聖人多男福壽

四奏民樂生之曲 大報禮初成象乾德運皇誠神州

赤縣永清寧靈雨和風樂太平陰陽交暢品物咸亨元  
化自流行允殖羣生

迎膳曲水龍吟 五色祥雲捧玉皇開闔闔坐明光鈞

天樂奏冬日御筵張文恬武熙太平氣象人在唐虞上

進膳曲水龍吟 玉律陽回景運新燕鎬京藹皇仁光

昭雲漢一氣沸韶頀錦瑟和聲瑤琴清韻瞻仰天顏近

進湯曲太清歌工萬方民樂時雍鼓舞荷天 雷行風  
動喜今逢南蠻北貊東夷西戎來朝貢大明宮星羅斗  
拱九重天上六飛龍五色雲間雙彩鳳普天率土效華  
封允協河清頌

奏車書會同舞曲 其一新水令五雲深護九重城感  
洪恩一人有慶陽初長禮方行帝德文明表率邦家正  
其二水仙子萬方安堵樂康寧九域同仁荷聖明千  
年撫運承天命露垂甘河獻清見雙岐秀麥連莖喜靈

雪隨冬應覩祥雲拂曙生神與化並運同行

五奏感皇恩之曲 雙闕五星光霓星樹紫蓋張璇臺  
玉歷轉新陽鈞天廣樂諧宮商恩深露湛喜溢霞觴日  
月煥龍章地久天長

奏表正萬邦舞蹈 其一慶太平維天眷我聖明禮園  
丘至德精誠乾元永清洪膺景命休徵應泰階平 其  
二千秋歲聖主乘龍御萬邦慶雲翔化日重光羣臣拜  
舞稱壽觴載歌天保章 其三滾繡毬五雲車度九重

利見飛龍耀哀章火藻華蟲擊虎敵考鳧鐘鼉鼓達達  
八珍列九鼎豐隆堯眉揚彩舜重瞳萬國咸熙四海雍  
齊歌頌聖德神功 其四殿前歡萬年禮樂中興日大  
化覩重熙河清海宴臻祥瑞五行順七政齊超三邁五  
貞元會既醉頌鳧鷖 其五天下樂萬靈朝拱接清都  
享南郊欽天法祖願聖人承乾納祐中和位育龜獻範  
馬陳圖 其六醉太平禮樂萬年規謳歌四海熙衣冠  
蹈舞九龍墀麗正仰南離紫雲高捧唐虞帝垂衣天下

文明治鎬烏岐鳳呈嘉瑞真個是人在成周世

六奏慶豐年之曲 聖人懋承乾綏萬國屢豐年神倉

御廩登天田明染鬱鬯祀孔庾輿情咸豫協氣用宣萬  
古帝圖傳璧合珠聯

七奏集禎應之曲 天保泰階平寶露降渾河清嘉禾

秀麥集休禎遐陬絕域喜氣盈一人有慶百度惟貞萬

國頌咸寧麗正重明

八奏永皇圖之曲 鎬燕集天京頌魚藻歌鹿鳴邊陲

安堵萬國寧重譯來庭四海清咸池日暘昧谷雲征帝  
座仰前星豫大豐亨

九奏樂太平之曲 皇極永登祥乾符啟泰運昌玉管  
回春動一陽金鑾錫燕歌九章虞庭獸舞岐山鳳翔日  
麗袞龍裳主聖臣良

迎膳曲水龍吟 香霧氤氲紫閣重仰天德瞻帝容星  
輝海潤甘雨間和風樂比鴛魚瑞呈麟鳳永獻卷阿頌  
進膳曲其一水龍吟 萬戶千門啟建章台階峻帝座



張三垣九道北斗玉衡光元氣調和雅韻鏗鏘昭代慶  
明良 其二太清歌萬方國盡來庭稽首歌帝仁仰荷  
生成振乾綱陰陽順序民物樂生逢明聖萬年春永膺  
休命華夷蠻獠咸歸正蒼生至老不知兵鼓腹含哺固  
太平九有享清寧

奏天命有德舞曲 其一萬歲樂太平天子興隆日履  
初長陽回元吉醴泉芝草休徵集曾聞道五星聚室  
其二賀聖朝一人元良百度維新握赤符凝元應享太

清大禮方行祀事孔 感天心億載恒承應明主慎德  
四夷咸賓

奏纓鞭得勝蠻夷隊舞承應曲 其一醉太平星華紫  
殿高雲氣彤樓遠九夷重譯梯航到皇圖光八表玉宇  
無塵明月皎銀河自轉扶桑曉平平蕩蕩歸王道百獸  
舞鳳鳴簫韶 其二看花會普天下都賴吾皇至聖看  
玉闕頻欵天山已定四夷效順歸王命天保歌羣黎百  
姓 其三天下樂九重樂奏萬花開望龍樓雲蒸霧靄

仰天工雍熙帝載臣民歡戴溥仁恩徧九垓 其四清  
江引黃鍾既奏陽和長德盛天心貺人文日月明國勢  
山河壯衢室民謠頻擊壤

奏致詞曲 其一清江引鈞天畢奏日方中既奏歡聲  
動雲章傍袞龍颺勢翔威鳳萬方安樂興嘉頌 其二  
千秋歲上下交歡燕禮成一陽奮萬彙咸亨風雲會合  
開明運紫極轉璇衡

宴畢百官行禮曲朝天子 文班武班歡動承明殿禮

成樂備頌聲喧真咫尺仰天顏日照龍筵風回雉扇翠  
蕤旋奉仙鑒雲間斗間五色金章燦

還宮曲萬歲樂 天回北極雲成瑞望層層重華日麗  
九垓八極樂雍熙祝聖壽萬萬歲

永樂間小宴樂章

一奏本太初之曲朝天子 混兮沌兮水土成元氣不  
分南北與東西未辨天和地萬象包涵其中秘密難窮  
造化機是陰陽本體乃為之太極而儀因而立

三奏仰太平之曲歸朝歡 太極分混然方始見儀形  
清浮濁偃乾坤定日月齊興昭青霄萬象明陽須動陰  
須靜陰與陽皆相應流行二氣萬物俱生

三奏明初生之曲 其一沽美酒乾坤清宇宙寧六合  
淨四維正萬象原來一氣生定三才五行民與物共成  
羣 其二太平令為一類不分人品竟生食豈曉庖烹  
避寒暑巢居穴遁披樹葉相尋趣如何是愛親世情治  
生雖混然各安其性

四奏品物亨之曲醉太平 黎民生世間萬物長塵寰  
陰陽交運轉循環久遠時庶繁相傳氣候應無間品物  
交錯憑誰鑒望聖人出世整江山主萬民得安

五奏御六龍之曲 其一清江引人心久仰生聖君天  
使人生聖聖人受天機體天居中正御六龍聖明登九  
重 其二碧玉簫君坐神京海嶽共從新民仰君恩聖  
治有人倫人品分萬物增聖承乾百福臻垂法明尊天  
命興後朝皆從正

六奏泰階平之曲十二月 聖乃有言天天是無言聖  
聖人臨正萬物亨通恩威盛社稷安仁德盛江山定選  
用賢英興王政分善惡賞罰均平三公九卿左右股肱  
庶事康寧

七奏君德成之曲 其一十二月皇基以興聖帝修身  
奉天體道聖德愈明敬天地勤勞萬民立法度上下咸  
寧 其二堯民歌風俗禮樂厚彝倫爰興學校進儒經  
賢臣良將保朝廷四野人民頌歡聲用的是賢英賢英

卷六十三  
定太平寰海皆歸正

八奏聖道行之曲 其一金殿萬年歡三綱既定九疇  
復興聖道如天嘉禾齊秀寒暑和平聖威無邊皇基穩  
勝磐石慶雲生景星長現三光輝耀百穀收成萬姓安  
寧 其二得勝令聖德感皇乾甘露降山川萬邦來朝  
貢奇珍擺布金玉階下鳴鞭仰聖主升金殿丹墀列英  
賢讚吾皇豐稔年

九奏樂清寧之曲 其一普天樂萬邦寧皇圖正父君



母后天下咸欽君治外永聖明后治內長安靜後聖承  
乾皆從正德相傳聖子神孫天威浩蕩江山永固洪福  
無窮 其二沽美酒和氣生滿玉京祥烟起映皇宮明  
聖開基整萬民風雲會帝庭奏簫韶九韻成 其三太  
平令紫霧隱金鑾彩鳳祥光罩良將賢臣玉案列珍羞  
美醞寶鼎熟龍涎香噴至尊永寧儲嗣守成賀萬萬歲  
一人有慶

右二奏至八奏俱奏百戲承應第九奏魚躍于淵承應

奉天門宴百官止用本太初仰大明民初生三奏曲其  
進酒進膳樂同惟百官叩頭禮用朝天子曲宴畢導駕  
還宮用御鑾歌

嘉靖間仁壽宮落成宴饗樂章

一奏本太初之曲朝天子 帝皇帝明寶位基昌命仙  
苑開筵歌鹿鳴亭殿天章映我有嘉賓鼓瑟吹笙示周  
行昭德音日升月恒萬載皇圖正

二奏仰大明之曲殿前歡 天保定聖人多壽多男慶

修和禮樂協中興麗正重明如山阜如岡陵如川方至  
莫不增協氣生禎祥應百神受命萬國來庭

三奏民初生之曲 其一沽美酒黃河清寶露凝瑞麥  
呈靈鵲鳴諸福來同仰聖明喜萬寶告成占景緯泰階  
平 其二太平令念農桑衣食之本仰君德獨厚民生  
事耕鑿羣黎百姓歌鹿鳴神人胥慶明主宴嘉賓承筐  
鼓瑟吹笙繼自今福增天定

四奏品物亨之曲醉太平 瑤宮怡聖顏閭苑隅人寰

吹笙鼓瑟賓旨酒天開宴鹿鳴歌舞黃金殿賴吾皇錫  
福萬民安醉歌天保歡

五奏御六龍之曲 其一清江引聖主有道樂昇平宴  
會延休慶務本珍民生宏化寧天命欣落成萬載開鴻  
運 其二碧玉簫帝重農桑法駕起明光麟遊鳳翔宴  
陳天保章開玳筵薦瑤觴既醉頌洋洋聖德巍皇恩蕩  
世際唐虞上

進膳曲 其一水龍吟寶瑟瑤笙鼓吹喧聖天子御華

筵南山萬壽瑞日正中天百穀豐年八方珍膳人樂昇  
平宴 其二太清歌祥麥嘉瓜臻瑞仰荷堯舜主愛育  
羣黎感天意五風十雨秋報春祈徧爾德勸農桑日用  
飲食嘉賓和樂開筵地紅雲捧雕盤珍味山呼萬歲福  
無疆日升川至 其三上清歌仰賴吾皇參天兩地凝  
和氣四三王六五帝國家興賢才為上瑞養萬民九域  
熙百祿咸宜 其四開天門寶殿輝龍虎風雲會瞻丹  
陛觀紫微周詩歌既醉鑫斯麟趾開祥瑞仰飛龍在天

位

豳風亭宴講官樂章

一奏本太初之曲朝天子 九重詔傳殿閣開秋宴授  
衣時節肅霜天禾稼登場徧鼓瑟吹笙昇平重見工歌  
七月篇春酒當筵獻願吾皇萬年歲歲臨西苑

二奏仰大明之曲殿前歡 鳳苑御筵開黃花映玉階  
鹿鳴天保歌三代古調新裁奉君王萬壽盃日月明乾  
坤大看年年秋報賽太平有象元首明哉

三奏民初生之曲 其一沽美酒熙春陽化日長執懿  
筐采柔桑拾繭綠絲有萬箱染紅黃孔陽為公子製衣  
裳 其二太平令勤樹藝歲年足穰九十月禾黍登場  
為春秋甕浮新釀村田樂齊歌齊唱饗公堂殺羊舉觴  
繼進著兕觥祝聖壽萬靈扶相

四奏品物亨之曲醉太平 納嘉禾滿場釀御酒盈缸  
公桑三績製元黃服龍衣袞裳螽斯蟋蟀諧清唱水光  
山色明仙仗豳風亭殿進霞觴祝聖壽無疆

五奏御六龍之曲 其一清江引九月風光何處有鳳  
苑在龍池右農夫稼已登公子衣方授萬歲君王頻進  
酒 其二碧玉簫凡我生民農桑最苦辛終歲經營氣  
候變冬春田畷欣婦子勤詠豳詩仰化鈞場圃新風雨  
順宴御墀龍顏近

進膳曲 其一水龍吟養老休農敞御筵瀉春酒介耆  
年割羊剪韭社鼓正闐闐香粳米顙升堂拜獻此樂真  
堪羨 其二太清歌九月天開西苑宸居無逸殿講幄



張筵集儒流雲蒸星炫壁緯珠躔睹御製煥天章昭回  
雲漢堯天舜日民安宴御廩神倉百穀登金輝玉燦休  
徵見大有豐年其三上清歌鳳苑宸居公桑帝藉今  
方舉躬耕蠶勸士女獻羊羔升堂奏樂舞葵菽棗壺上  
珍厨萬壽山呼其四開天門幽風亭共仰吾皇聖百  
穀登萬國咸寧民康物阜禎祥應仰乾運俯坤靈  
隆慶三年大閱禮成回鑾樂章

武成之曲 吾皇閱武成簡戎旅壯帝京龍旗照耀虎

豹營六師擁甲冑明威靈廣播蠻夷震驚稽首拜頌昇  
平四海澄清

嘉靖間皇后親蠶宴內外命婦樂章

陞生奏天香鳳韶之曲 春雲繚繞芳郊曙喜乾坤萬  
象咸舒蘭皋蕙圃迎仙馭采桑條攀茂樹蠶宮繭館親  
臨御壁月珠星照太虛開筵還駐翠旂旗萬載垂貞譽  
進膳曲沽美酒 蠶禮成鳳輦停薦霞觴列雲屏宮妃  
世婦仰坤寧祥雲映紫冥同頌耀前星

回宮御鑾歌 惟天啟聖皇君耕藉后躬桑身先田織  
率萬邦天清地寧民阜康百穀用成四夷來王治化登  
虞唐世發禎祥

永樂間定東宮饗樂章

一奏喜千春之曲賀聖朝 開國承天聖感極多總一  
統封疆潤百姓快活萬物榮光共沐恩波仙音韻合讚  
昇平詠歌齊朝拜千千歲東宮滿國春和

二奏永南山之曲水仙子 洪基永固海波清盛世明

時禮樂興華夷一統江山靜民通和樂太平讚東宮仁  
孝賢明秉鈞衡端正順乾坤泰亨坐中華萬世昌寧

三奏桂枝香之曲蟾宮曲 曉光融晏饗春宮日朗風

和嘉氣蔥蔥鎮領台樞規宏綱憲禮節至公事聖上柔  
聲婉容問安寧勤孝虔恭果斷寬洪剛健文明聖德合同

四奏初春曉之曲小梁州 端拱嚴宸事紫微秉運璇

璣四時百物總相宜仰賴明君德大業勝磐石皇儲仁

孝明忠義美遐方順化朝儀孝能歡慈愛心敬篤上尊

卑意禮上和下睦民鼓舞樂雍熙

五奏乾坤泰之曲滿庭芳 春和玳筵安邦興國欽聖  
尊賢文英武烈於民便禮樂成全享大業中庸不偏順  
天常節儉為先達文獻嚴儀訓典孝敬億千年

六奏昌運頌之曲喜秋風 文武安軍民樂宴文華會  
班僚五雲齊動鈞天樂賀春宮讚皇朝

右二奏至六奏俱奏百戲承應

七奏泰道開之曲沽美酒 布春風滿畫樓對嘉景鳳

鳳洲高捧金波碧玉甌設威儀左右分品從列公侯  
其二太平令效聖上誠心勤厚主宗器嚴脩春秋諧律  
呂仙音齊奏欽王政皇天保佑拜舞頓首讚祝進酒千  
千歲康寧福壽

迎膳曲水龍吟壽方饗笙簧鼓樂喧排寶器門開玳筵  
鑾儀旌節錦繡景相連簪纓趨進皆來朝見春滿文華  
殿

陞座還宮百官行禮奏千秋歲曲 堯年舜日勝禹周

慶雲生繚繞鳳樓風調雨順五穀收萬民暢歌謳  
朝朔望

同

明史卷六十三



欽定四庫全書

明史卷六十四

大學士張廷玉等奉 勅修

志第四十

儀衛

周官王之儀衛分掌於天官春官夏官之屬而蹕事則  
專屬於秋官漢朝會則衛官陳車騎張旗幟唐沿隋制  
置衛尉卿掌儀仗帳幕之事宋衛尉領左右金吾衛司

左右金吾仗司六軍儀仗司主清道徼巡排列奉引儀仗  
元置拱衛司領控鶴戶以供其事歷代制度雖有沿革  
異同總以謹出入之防嚴尊卑之分慎重則尊嚴尊嚴  
則整肅是故文謂之儀武謂之衛天子出車駕次第謂之  
鹵簿而唐制四品以上皆給鹵簿則君臣並得通稱也  
明初詔禮官鹵簿彌文務從省節以示尚質去奢之意  
凡正至聖節朝會及冊拜接見蕃臣儀鸞司陳設儀仗  
而中宮東宮親王皆有儀仗之制後或隨時增飾要以洪

武創制為準則焉茲撮集禮所載大凡以備考核其郡王及皇妃東宮妃以下儀仗載在會典者並著於篇云

皇帝儀仗吳元年十二月辛酉中書左相國李善長率禮官以即位禮儀進是日清晨拱衛司陳設鹵簿列甲士於午門外之東西列旗仗於奉天門外之東西龍旗十二分左右用甲士十二人北斗旗一纛一居前豹尾一居後俱用甲士三人虎豹各二馴象六分左右布旗六十四門旗日旗月旗青龍白虎風雲雷雨江河淮濟

旗天馬天祿白澤朱雀元武等旗木火土金水五星旗  
五獄旗熊旗鸞旗及二十八宿旗各六行每旗用甲士  
五人一人執旗四人執弓弩設五輅於奉天門外玉輅  
居中左金輅次革輅右象輅次木輅俱並列丹墀左右  
布黃麾仗黃蓋華蓋曲蓋紫方纛紅方纛雉扇朱團扇  
羽葆幢豹尾龍頭竿信幡傳教幡告止幡絳引幡戟麾  
戈麾儀鎗麾等各三行丹陛左右陳幢等響節金節燭  
籠青龍白虎幢班劍吾杖立瓜卧瓜儀刀鐙杖戟骨朵

朱雀元武幢等各三行殿門左右設圓蓋一金交椅金  
脚踏水盆水罐團黃扇紅扇皆校尉擎執洪武元年十  
月定元旦朝賀儀金吾衛於奉天門外分設旗幟宿衛  
於午門外分設兵仗衛韋寺於奉天殿門及丹陛丹墀  
設黃麾仗內使監擎執於殿上凡遇冬至聖節冊拜親  
王及蕃使來朝儀俱同其宣詔赦降香則惟設奉天殿  
門及丹陛儀仗殿上擎執云其陳布次第午門外刀盾  
交叉各置於東西甲士用赤奉天門外中道金吾宿衛

二衛設龍旗十二分左右用青甲士十二人北斗旗一  
纛一居前豹尾一居後俱用黑甲士三人虎豹各二馴  
象六分左右左右布旗六十四左前第一行門旗二每  
旗用紅甲士五人內一人執旗旗下四人執弓箭第二  
行月旗一用白甲士五人內一人執旗旗下四人執弩  
青龍旗一用青甲士五人內一人執旗旗下四人執弩  
第三行風雲雷雨旗各一每旗用黑甲士五人內一人  
執旗旗下四人執弓箭天馬白澤朱雀旗各一每旗用

紅甲士五人內一人執旗旗下四人執弓箭第四行木  
火土金水五星旗各一隨其方色每旗用甲士五人內  
一人執旗旗下四人執弩其甲木青火紅土黃金白水  
黑熊旗鸞旗各一每旗用紅甲士五人內一人執旗旗  
下四人執弩第五行角亢氐房心尾箕旗各一每旗用  
青甲士五人內一人執旗旗下四人執弓箭第六行斗  
牛女虛危室壁旗各一每旗用青甲士五人內一人執  
旗旗下四人執弩右前第一行門旗二每旗用紅甲士

五人內一人執旗旗下四人執弓箭第二行日旗一用  
紅甲士五人內一人執旗旗下四人執弩白虎旗一用  
白甲士五人內一人執旗旗下四人執弩第三行江河  
淮濟旗各一隨其方色每旗用甲士五人內一人執旗  
旗下四人執弓箭其甲江紅河白淮青濟黑天祿白澤  
元武旗各一每旗用甲士五人內一人執旗旗下四人  
執弓箭天祿白澤紅甲元武黑甲第四行東南中西北  
五嶽旗各一隨其方色每旗用甲士五人內一人執旗



旗下四人執弩其甲東嶽青南嶽紅中嶽黃西嶽白北嶽黑熊旗麟旗各一每旗用紅甲士五人內一人執旗旗下四人執弩第五行奎婁胃昂畢觜參旗各一每旗用青甲士五人內一人執旗旗下四人執弓箭第六行井鬼柳星張翼軫旗各一每旗用青甲士五人內一人執旗旗下四人執弩奉天門外拱衛司設五輅玉輅居中左金輅次革輅右象輅次木輅俱並列典牧所設乘馬於文武樓之南各三東西相向丹墀左右布黃麾仗

凡九十分左右各三行左前第一行十五黃蓋一紅大  
繖二華蓋一曲蓋一紫方繖一紅方繖一雉扇四朱團  
扇四第二行十五羽葆幢二豹尾二龍頭竿二信幡二  
傳教幡二告止幡二絳引幡二黃麾一第三行十五戟  
麾十戈麾五儀鎗麾五右前第一行十五黃蓋一紅大  
繖二華蓋一曲蓋一紫方繖一紅方繖一雉扇四朱團  
扇四第二行十五羽葆幢二豹尾二龍頭竿二信幡二  
傳教幡二告止幡二絳引幡二黃麾一第三行十五戟

麾五戈麾五儀鎧麾五皆校尉擎執丹陛左右拱衛司  
陳幢節等仗九十分左右為四行左前第一行響節十  
二金節三燭籠三第二行青龍幢一班劍三吾仗三立  
瓜三卧瓜三儀刀三鎧杖三戟三骨朶三朱雀幢一右  
前第一行響節十二金節十二籠三第二行白虎幢一  
班劍三吾杖三立瓜三卧瓜三儀刀三鎧杖三戟三骨  
朶三元武幢一皆校尉擎執奉天殿門左右拱衛司陳  
設左行圓蓋一金脚踏一金水盆一團黃扇三紅扇三

右行圓蓋一金交椅一金水罐一團黃扇三紅扇三皆  
校尉擎執殿上左右內使監陳設左拂子二金唾壺一  
金香合一右拂子二金唾盂一金香爐一皆內使擎執  
和聲郎陳樂於丹墀文武官拜位之南其氣數詳見樂  
志內三年命製郊丘祭祀拜褥郊丘用席表蒲裏為褥  
宗廟社稷先農山川用紅文綺表紅木棉布裏為褥十  
二年命禮部增設丹墀儀仗黃繖華蓋曲蓋紫方繖紅  
方繖各二雉扇紅團扇各四羽葆幢龍頭竿絳引傳教

告止信幡各六戟麾戈麾鎧麾各十永樂元年禮部言  
鹵簿中宜有九龍車一乘請增置帝曰禮貴得中過為  
奢不及為斂先朝審之精矣當遵用舊章豈可輒有增  
益以啟後世之奢哉九龍車既先朝所無其仍舊便宣  
德元年更造鹵簿儀仗有具服幄殿一座金交椅一金  
腳踏一金盆一金罐一金馬杌一鞍籠一金香爐一金  
香合一金唾盂一金唾壺一御杖二擺錫明甲一百副  
盛一百弓一百箭三千刀一百其執事校尉每人鵝帽

只孫木銅帶鞞履鞋一副常朝各色羅掌扇四十各色  
羅絹繖十萬壽繖一黃雙龍扇二筵宴銷金羅繖四銷  
金雨繖四金龍響節二十四

皇后儀仗洪武元年定丹陛儀仗三十六人黃麾二戟  
五色繡旗六戈五色繡旗六鎗五色錦旗六小雉扇四  
紅雜花團扇四錦曲蓋二紫方繖二紅大繖四丹墀儀  
仗五十八人班劍四金吾杖四立瓜四卧瓜四儀刀四  
鐙杖四骨朶四斧四響節十二錦花蓋二金交椅一金

脚踏一金水盆一金水罐一方扇八宮中常用儀衛二十人內使八人色繡旗二金斧二金骨朵二金交椅一金脚踏一宮女十二人金水盆一金水罐一金香爐一金香合一金唾壺一金唾盂一拂子二方扇四永樂元年增置紅杖一對

太皇太后皇太后儀仗與皇后同

皇太子儀仗洪武元年定門外中道設龍旗六其執龍旗者並戎服黃旗一居中左前青旗一右前赤旗一左

後黑旗一右後白旗一每旗執弓弩軍士六人服各隨  
旗色殿下設三十六人絳引旛二戟麾六戈麾六鎗麾  
六羽葆幢六青方纛二青小方扇四青雜花團扇四皆  
校尉擎執殿前設四十八人班劍四吾杖四立瓜四卧  
瓜四儀刀四鎰杖四骨朶四斧四響節十二金節四皆  
校尉擎執殿門設十二人金交椅一金脚踏一金水罐  
一金水盆一青羅團扇六紅圓蓋二皆校尉擎執殿上  
設六人金香爐一香合一唾盂一唾壺一拂子二皆內



使擎執永樂二年禮部言東宮儀仗有司失紀載視親  
王差少宜增置金香爐金香合各一及二义二傳教告  
止信幡各二節二幢二夾稍二稍刀盾各二十戟八紅  
紙油燈籠六紅羅銷金邊圓繖紅羅繡圓繖各一紅羅  
曲蓋繡繖紅羅素圓繖紅羅素方繖青羅素方繖各二  
紅羅繡孔雀方扇紅羅繡四季花團扇各四拂子二唾  
盂唾壺各一鞍籠一誕馬八紅令旗二清道旗四攄弩  
一白澤旗二弓箭二十副從之

親王儀仗洪武六年定宮門外設方色旗二清色白澤  
旗二執人服隨旗色並戎服殿下絳引旛二戟麾二戈  
麾二鐙麾二皆校尉執殿前班劍二吾杖二立瓜二卧  
瓜二儀刀二鐙杖二骨朶二斧二響節八皆校尉執殿  
門交椅一脚踏一水罐一水盆一團扇四蓋二皆校尉  
執殿上拂子二香爐一香合一唾壺一唾盂一十六年  
詔親王儀仗內交椅盆罐用銀者悉改用金建文四年  
禮部言親王儀仗合增紅油絹銷金雨繳一紅紗燈籠

紅油紙燈籠各四魷燈二大木銅角四從之永樂三年  
命工部親王儀仗內紅銷金繖仍用寶珠龍文凡世子  
儀仗同

郡王儀仗令旗二清道旗二攄弩一刀盾十六弓箭十  
八副絳引傳教告止信幡各二吾仗儀刀立瓜卧瓜骨  
朶斧各二戟十六稍十六麾一幢一節一響節六紅銷  
金圓繖一紅圓繖一紅曲柄繖二紅方繖二青圓扇四  
紅圓扇四誕馬四鞍籠一馬杌一拂子二交椅一脚踏

卷六十四  
一水盆一水罐一香爐一紅紗燈籠二魷燈二帳房一座

皇妃儀仗紅杖二清道旗二絳引旛二戈斃戟斃儀  
斃吾杖儀刀班劔立瓜卧瓜鐙杖骨朶金鈇各二響節  
四青方纈四紅繡圓纈一拂子二水盆一水罐一香爐  
圓扇四交椅一脚踏一拂子二水盆一水罐一香爐一  
香合一唾盂一唾壺一紅紗燈籠四

東宮妃儀仗紅杖二清道旗二絳引旛二儀鎗斃戈斃

戟斃吾杖儀刀班劍立瓜卧瓜鐙杖骨朶金鉞各二響  
節四青方繖二紅素圓繖二紅繡圓繖一紅繡方扇四  
紅繡花圓扇四青繡圓扇四交椅一脚踏一拂子二水  
盆一水罐一香爐一香合一紅紗燈籠四永樂二年禮  
部言東宮妃儀仗如親王妃惟香爐香合一如中宮但亦  
不用金其水盆水罐皆用銀從之

親王妃儀仗紅杖二清道旗二絳引旛二戟斃吾杖儀  
刀班劍立瓜卧瓜骨朶鐙杖各二響節四青方繖二紅

綵畫雲鳳繖一青孔雀圓扇四紅花扇四交椅一脚踏  
一水盆一水罐一紅紗燈籠四拂子二公主世子妃儀  
仗俱同

郡王妃儀仗紅杖二清道旗二絳引旛二戟麾吾杖班  
劍立瓜骨朶各二響節二青方繖二紅圓繖一青圓扇  
二紅圓扇二交椅一脚踏一拂子二紅紗燈籠二水盆  
一水罐一

郡主儀仗朴杖二清道旗二班劍吾杖立瓜骨朶各二

響節二青方纈一紅圓纈一青圓扇二紅圓扇二交椅  
一脚踏一水盆一水罐一紅紗燈籠二拂子二舊例郡  
王儀仗有交椅馬杌皆木質銀裏水盆水罐及香爐香  
合皆銀質抹金量折銀三百二十兩郡王妃儀仗有交  
椅等大器量折銀一百六十兩餘皆自備充用嘉靖四  
十四年定除親王及親王妃初封儀仗照例頒給外其  
初封郡王及郡王妃折銀等項併停止萬厯十年定郡  
王初封係帝孫者儀仗照例全給係王孫者免蓋宗室

分封漸多勢難徧給也

明史卷六十四



欽定四庫全書

明史卷六十五

大學士張廷玉等奉 敕修

志四十一

輿服一

大輅

玉輅

大馬輦

小馬輦

步輦

大涼步輦

板輈

耕根車

后妃車輿

皇太子親王以下車輿

公卿以下車輿

繖蓋

鞍轡

有虞氏御天下車服以庸夏則黻冕致美商則大輅示  
儉成周有巾車典輅弁司司服之職天子以之表式萬  
邦而車服五乘下逮臣民漢承秦制御金根為乘輿服  
初元以承大祀東都乃有九旂雲罕旒冕約屨之儀物  
踵事增華日新代異江左偏安玉輅棲寶鳳采旄銜金  
龍其服冕也或飾翡翠珊瑚雜珠豈古所謂法駕法服

者哉唐武德間著車輿衣服之制上得兼下下不得擬上宋初袞冕不綴珠玉政和中詔修車輅並建旂常議禮局所釐定用為成憲元制郊祀則駕玉輅服袞冕巡幸或乘象輶四時質孫之服各隨其宜明太祖甫有天下考定邦禮車服尚質酌古通今合乎禮意迄于世宗藉田造耕根燕居服燕弁講武用武弁更為忠靖冠以風有位為保和冠以親宗藩亦一王之制也若夫前代織扇鞍勒之儀門戟旌節之屬咸別等威至宋加密明

初儉德開基宮殿落成不用文石甃地以此坊民武臣  
猶有飾金龍於牀幔馬廐用九五間數而豪民亦或鎔  
金為酒器飾以金玉珠太祖皆重懲其弊命儒臣稽古  
講禮定官民服舍器用制度歷代守之遞有禁例茲更  
以朝家冊寶中外符信及宮室器用之等差附叙於後  
焉

天子車輅明初大朝會則拱衛司設五輅於奉天門玉  
居中左金次革右象次木駕出則乘玉輅後有腰輿以

八人載之其後太祖考周禮五輅以詢儒臣曰玉輅太侈何若祇用木輅博士詹同對曰孔子云乘殷之輅即木輅也太祖曰以玉飾車古惟祀天用之常乘用宜殷輅然祀天之際玉輅未備木輅亦未為不可叅政張昶曰木輅戎輅也不可以祀天太祖曰孔子斟酌四代禮樂以為萬世法木輅寧不可祀祀在誠敬豈泥儀文洪武元年有司奏乘輿服御應以金飾詔用銅有司言費小不足惜太祖曰朕富有四海豈怯乎此第儉約非身

先無以率下且奢泰之習未有不由小而至大者也六年命禮官考五輅制為木輅二乘一以丹漆祭祀用之一以皮鞅行幸用之是冬大輅成命更造大輅一象輅十中宮輅一後宮車十飾俱以鳳以將幸中立府故造之非常制也二十六年始定鹵薄太駕之制玉輅一大輅一九龍車一步輦一後罷九龍車永樂三年更定鹵薄大駕有大輅玉輅大馬輦小馬輦步輦大涼步輦板輅各一具服幄殿各一

大輅高一丈三尺九寸五分廣八尺二寸五分輅座高四尺一寸有奇上平盤前後車櫺並雁翅及四垂如意滴珠板轅長二丈二尺九寸有奇紅髹鍍金銅龍頭龍尾龍鱗葉片裝釘平盤下方箱四周紅髹匡俱十二榻內飾綠地描金繪獸六麟狻猊犀象天馬天祿禽六鸞鳳孔雀朱雀翟鶴盤左右下有護泥板及車輪二貫軸一每輪輻十有八其輞皆紅髹抹金銅釵花葉片裝釘輪內周心用抹金銅釵蓮花瓣輪盤裝釘軸中纏黃絨

駕轅諸索輅亭高六尺七寸九分四柱長五尺八寸四分檻座皆紅髹前二柱鉞金柱首寶相花中雲龍文下龜文錦前後右有門高五尺一寸九分廣二尺四寸九分四周裝雕木沉香色描金香草板十二片門旁榻各二及門枕俱紅髹以抹金銅釵花葉片裝釘榻編以黃線條後紅髹以抹金雕描金雲龍五彩髹板戲金雲龍一屏後地沉香色上四榻雕描金雲龍四其次雲板如之下三榻雕描金雲龍三其次雲板亦如之俱抹金銅



銀花葉片裝釘亭內黃線條編紅髹匡軟座下蓮花墜  
石施花毯紅錦褥席紅髹坐椅靠背上雕描金金雲龍  
一下雕雲板一紅髹福壽板一并褥椅中黃織金椅靠  
坐褥四圍椅裙施黃綺帷幔亭外青綺綠邊紅簾十扇  
輅頂并圓盤高三尺有奇鍍金銅蹲龍頂帶仰覆蓮座  
垂攀頂黃線圓條盤上以紅髹其下外四面地沉香色  
描金雲內四角地青繪五采雲以青飾輅蓋亭內貼金  
斗拱承紅髹匡寶蓋闕以八頂冒以黃綺謂之黃屋中

并四周繡五彩雲龍九天輪三層皆紅髹上安雕木貼金邊耀葉板八十二片內綠地雕木貼金雲龍文三層間繪五彩雲觀板八十一片盤下四周黃銅釘裝施黃綺漚水三層每層八十一摺間繡五彩雲龍文四角垂青綺絡帶各繡五彩雲升龍圓盤四角連輅座板用攀頂黃線圓條并貼金木魚輅亭前有左右轉角闌干二扇後一字帶左右轉角闌干一扇皆紅髹內嵌雕木貼金龍間以五彩雲三扇共十二柱柱皆雕木貼金蹲龍

及線金五彩蓮花抱柱闌干內四周布花毯亭後樹太  
常旂二以黃線羅為之皆十有二旂每旂內外繡升龍  
一左旂腰繡日月北斗竿首用鍍金銅龍首右旂腰繡  
黻字竿首用鍍金銅戟各綴抹金銅鈴二垂紅纓十二  
纓上施抹金銅寶蓋下垂青線帔踏梯一紅髹以抹  
金銅釵花葉片裝釘行馬架二紅髹上有黃絨匾條用  
抹金銅葉片裝釘有黃絹幘衣即遮塵油絹雨衣青氍衣  
及紅油合扇梯紅油托叉各一輅以二象駕之

玉輅亦駕以二象制如大輅而無平盤下十二榻之飾輅亭前二柱飾以搏換貼金升龍屏風後無上四榻雲龍及雲板之飾天輪內用青地雕木飾玉色雲龍文而太常旂及踏梯行馬之類悉與大輅同

大馬輦古者輦以人輓之周禮巾車后五輅其一輦車組輓然縣師有車輦之稽泰苗詩云我任我輦則臣民所乘亦名輦至秦始皇去其輪而制乃尊明諸輦有輪者駕以馬以別於步輦焉其制高一丈二尺九寸九分廣

八尺九寸五分轅長二丈五寸有奇輦座高三尺四寸有奇餘同大輅輦亭高六尺四寸有奇紅髹四柱長五尺四寸有奇檻座高與輅同四周紅髹條環板前左右有門高五尺有奇廣二尺四寸有奇門旁楬各二後楬三及明欂皆紅髹抹金銅釵花葉片裝釘楬心編以黃線條亭內制與大輅同第輦座上不用花毯而用紅毯亭外用紅簾十二扇輦頂并圓盤高二尺六寸有奇上下俱紅髹以青飾輦蓋其銅龍蓮座寶蓋黃屋及天輪

輦亭制悉與大輅同太常旂踏梯行馬之屬亦同大輅  
駕以八馬備鞍韉鞞轡鈴纓

小馬輦視大馬輦高廣皆減一尺轅長一丈九尺有奇  
餘同大馬輦輦亭高五尺五寸有奇紅髹四柱長五尺  
四寸有奇檻座紅髹四周條環板前左右有門高五尺  
廣二尺二寸有奇門旁櫺各二及明棧後屏風壁板俱  
紅髹用抹金銅釵花葉片裝釘亭底紅髹上施紅花毯  
紅錦褥席外用紅簾四扇駕以四馬餘同大馬輦

步輦者古之步輓明制高一丈二尺二寸有奇廣八尺二寸有奇輦座高三尺二寸有奇四周雕木五彩雲渾貼金龍板十二片間以渾貼金仰覆蓮座下雕木線金五彩雲板十二片輓四紅髹中二輓長三丈五尺九寸左右二輓長二丈九尺五寸有奇俱以鍍金銅龍頭龍尾裝釘輦亭高六尺三寸有奇四柱長六尺二寸有奇檻座紅髹四周雕木沉香色描金香草板十二片抹金銅鈸花葉片裝釘前左右有門高五尺七寸有奇廣二

尺四寸有奇門旁紅髹十字榻各二扇雕飾沉香色描金龍板八片下雲板如其數後紅髹屏風上雕木沉香色描金雲龍五屏後雕沉香色描金雲龍板三片又雲板如其數俱用抹金銅釵花葉片裝釘餘同馬輦惟紅簾用十扇輦頂并圓盤高二尺六寸有奇其蓮座輦蓋天輪幃衣之屬同馬輦

大涼步輦高一丈二尺五寸有奇廣一丈二尺五寸有奇四面紅髹匡裝雕木五彩雲板二十片間以貼金仰



覆蓮座下紅髹如意條環板如其數紅髹轅六中二轅  
長四丈三尺五寸有奇左右二轅長四丈有奇外二轅  
長三丈六尺五寸有奇前後俱飾以雕木貼金龍頭龍  
尾輦亭高六尺五寸有奇廣八尺五寸有奇四柱紅髹  
前左右有門高五尺八寸有奇廣二尺五寸有奇四周  
描金香草板十二片門旁榻各二後榻三及明杌皆紅  
髹編以黃線條亭底上施墊氈加紅錦褥并席紅髹坐  
椅一四周雕木沉香色描金寶相花靠背褥裙帷幔與

馬輦同內設紅髹桌二紅髹闌干香桌一闌干四柱首  
俱雕木貼金蹲龍鍍金銅龍蓋香爐一并香匙箸瓶紅  
錦墩二外紅簾三扇輦頂高二尺七寸有奇又鍍金銅  
寶珠頂帶仰覆蓮座高一尺三寸有奇垂攀頂黃線圓  
條四頂用丹漆上冒紅氊四垂以黃氊為如意雲黃氊  
緣條四周施綺瀝水三層每層百三十二黃摺間繡五  
彩雲龍文或用大紅羅冒頂以黃羅為如意雲緣條瀝  
水亦用黃羅頂下四周以紅氊為帷黃氊緣條四角鍍

金銅雲四亭內寶蓋繡五龍頂以紅髹木匡冒以紅綺  
為黃屋頂心四周繡雲龍各一輦亭內角至輦座用攀  
頂黃線圓條四并貼金木魚輦亭前左右轉門闌干二  
扇後一字帶轉角闌干一扇皆紅髹雕木渾貼金龍間  
以五彩雲板闌干內四周布席其闌干十二柱之飾及  
踏梯之屬俱與馬輦同

轎者肩行之車宋中興以後皇后嘗乘龍肩輿又以征  
伐道路險阻詔百官乘轎名曰竹轎子亦曰竹輿元皇

帝用象轎駕以二象至用紅板轎則自明始也其制高六尺九寸有奇頂紅髹近頂裝圓匡蚰房窗鍍金銅火鍍寶帶仰覆蓮座四角鍍金銅雲朵轎扛二前後以鍍金銅龍頭龍尾裝釘有黃絨墜角索四周紅髹板左右門二用鍍金銅釘鉸轎內紅髹匡坐椅一福壽板一并褥椅內黃織金綺靠坐褥四周椅裙下鋪席并踏褥有黃絹轎衣油絹雨衣各一青氍衣紅氍緣條雲子嘉靖十三年謁廟帝及后妃俱乘肩輿出宮至奉天門降輿

升輅隆慶四年設郊祀慶成宴帝乘板輿由歸極門出入皇極門至殿上降輿

車駕之出有具服帷殿按周官大小次木架葦障上下四旁周以帷帝以象宮室明鹵簿載具服幄殿儀仗有黃帳房仍元制也帳并帷幕以黃木棉布為之上施獸吻柱竿紅髹竿首彩裝蹲獅氈頂

耕根車世宗朝始造漢有耕車晉有耕根車俱天子親耕所用嘉靖十年帝將耕藉田詔造耕根車禮官上言

考大明集禮耕耤用宋制乘玉輅以耕根車載耒耜同行今儀注順天府官奉耒耜及種稭種置五彩輿先于祭前二日而出今用耕根車以載耒耜宜令造車于祭祀日早進呈置耒耜先玉輅以行第稽諸禮書祇有圖式而無高廣尺寸宜依今置車式差小通用青質從之皇后輅一高一丈一尺三寸有奇平盤前後車櫺並雁翅四垂如意滴珠板轅長一丈九尺六寸皆紅髹轅用抹金銅鳳頭鳳尾鳳翎葉片裝釘平盤左右垂護泥板

及輪二貫軸一每輪軸十有八皆紅髹輞以抹金釵花  
銅葉片裝釘輪內車轂用抹金銅釵蓮花瓣輪盤裝釘  
軸中纏黃絨駕轅諸索輅亭高五尺八寸有奇紅髹四  
柱檻座上沉香色描金香草板十二片前左右有門高  
四尺五寸有奇廣二尺四寸有奇門旁沉香色線金菱  
花榻各二下條環板有明杌抹金銅釵花葉片裝釘後  
紅髹五山屏風餞金鸞鳳雲文屏上紅髹板餞金雲文  
中裝釘木渾貼金鳳一屏後紅髹板俱用抹金銅釵花

葉片裝釘亭底紅髹上施紅花毯紅錦褥席紅髹坐椅  
一靠背雕木綿金五彩裝鳳一上下香草雲板各一紅  
福壽板一并褥椅中黃織金綺靠坐褥四周有椅裙施  
黃綺帷幔或黃線羅外用紅簾十二扇前二柱戩金上寶相  
花中鸞鳳雲文下龜文錦輅并圓盤盤高二尺有奇抹  
金銅立鳳頂帶仰覆蓮座垂攀頂黃線圓條四盤上紅  
髹下四周沉香色描金雲文內青地五彩雲文以青飾  
輅蓋內寶蓋紅髹匡闕以八頂冒以黃綺頂心及四周



繡鳳九并五彩雲文天輪三層紅髹上雕木貼金邊耀  
葉板七十二片內飾青地雕木五彩雲鸞鳳文三層間  
繪五彩雲襯板七十二片內四周黃銅裝釘上施黃綺  
漚水三層間繡鸞鳳文垂青綺絡帶繡鸞鳳褥各一圓  
盤四角連輅座板用攀頂黃線圓條四輅亭前後有左  
右轉角闌干各二扇內嵌條環板皆紅髹計十二柱柱  
首雕木紅蓮花線金青綠裝蓮花抱柱其踏梯行馬之  
屬與大馬輦同

安車本周禮后五輅之一應劭漢鹵簿之圖有五色安車晉皇后乘雲母安車唐皇后安車制如金輅明皇后安車獨簡素其制高九尺七寸有奇平盤前後車櫺並雁翅板轅二長一丈六尺七寸有奇皆紅髹用抹金銅鳳頭鳳尾鳳翎葉片裝釘平盤左右垂護泥板及輪二貫軸一每輪輻十有八皆紅髹軸中纏黃絨駕轅諸索車亭高四尺四寸紅髹方柱四上裝五彩五板十二片前左右有門高三尺七寸有奇廣二尺二寸有奇門旁

紅髹十字榻各二後三山屏風屏後壁板俱紅髹用抹  
金銅釵花葉片裝釘亭底紅髹板上施紅花毯紅錦褥  
四周施黃綺帷幔外用紅簾四扇車蓋用紅髹抹金銅  
寶珠頂帶蓮座高六寸四角抹金銅鳳頭用攀條四並  
紅髹木魚蓋施黃綺漚水三層銷金龍鳳文鳳頭下垂  
紅盼錯其踏梯行馬幃衣與輅同行障坐障自唐宋有  
之皇后重翟車後皆有行障六坐障三左右夾車宮人  
執之而唐書宋史不載其制金史行障長八尺高六尺

坐障長七尺高五尺明皇后用行障坐障皆以紅綾為之繪升降鸞鳳雲文行障繪瑞草于漚水坐障繪雲文於頂

太皇太后皇太后輅及安車行障坐障制與皇后同  
皇妃車曰鳳輶與厯代異名其制青頂上抹金銅珠頂  
四角抹金銅飛鳳各一垂銀香圓寶蓋并綵結轎身紅  
髹木匡三面箴織文簾繪以翟文抹金銅釵花葉片裝  
釘紅髹攔飾以抹金銅鳳頭鳳尾青銷金銅綠邊紅簾

并看帶內紅交牀并坐踏褥紅銷金羅轎衣一頂用銷  
金寶珠文漚水香草文看帶并幃皆鳳文紅油絹雨轎  
衣一自皇后以下皆用行障二坐障一第別以彩繪皇  
妃行障坐障俱紅綾為之繪雲鳳而行障漚水繪香草  
皇太子金輅高一丈二尺二寸廣八尺九寸有奇轅長  
一丈九尺五寸輅座高三尺二寸有奇平盤滴珠板輪  
輻輪輞悉同玉輅輅亭高六尺四寸有奇紅髹四柱長  
五尺四寸檻座上四周線金五彩香草板前左右有門

高五尺有廣廣二尺四寸有奇門旁榻各二編紅線條  
及明棧皆紅髹後五山屏風青地上雕木貼金龍五間  
以五彩雲文屏後紅髹板皆抹金銅釵花葉片裝釘紅  
髹匡軟座紅絨墜座大索四下垂蓮花墜石上施紅毯  
紅錦褥席紅髹椅一納板一并褥椅中紅織金綺靠坐  
褥四周有椅裙施紅羅帷幔外用青綺緣邊紅簾十二  
扇椅雕貼金龍彩雲下線金彩雲板一亭內編紅線條  
輅頂并圓盤高二尺五寸有奇又鍍金銅寶珠頂線條

覆蓮座高九寸垂攀頂紅線圓條四盤上丹漆下內外  
皆青地繪雲文以青飾輅蓋亭內周圍青斗拱承以丹  
漆匡寶蓋闕以八頂冒以紅綺頂心繡雲龍餘繡五彩  
雲文天輪三層皆紅髹上雕木貼金邊耀葉板七十二  
片內飾青地雕木貼金雲龍文三層間繪五彩雲襯板  
七十二片四周黃銅裝釘上施紅綺漚水三層每層七  
十二摺間繡五彩雲龍文四角之飾與大輅同第圓條  
用紅線輅亭前一字闌干一扇後一字帶轉角闌干一

扇左右闌干二扇內嵌五彩雲板皆丹漆計十四柱柱  
首制與大輅同亭後建紅旂二以紅羅為之九斿每旂  
內外繡升龍一左旂腰繡日月北斗竿用抹金銅龍首  
右旂腰繡散字竿用抹金銅戟綴珠金銅鈴二垂紅纓  
其階梯行馬之屬與玉輅同帳房用青木棉布竿首青  
絲蹲狔餘同乘輿帳房

東宮妃車亦曰鳳輶小輶制同皇妃行障坐障之制亦  
同



親王象輅其高視金輅減六寸其廣減一尺轅長視大輅減一尺輅座高三尺有奇餘飾同金輅輅亭高五尺二寸有奇紅髹四柱檻座上四周紅髹條環板前左右有門高四尺五寸有奇廣二尺二寸有奇門旁榻各二及明杌後五山屏風皆紅髹用抹金銅釵花葉片裝釘亭底紅髹施紅花毯紅錦褥席其椅靠坐褥帷幔紅簾之制俱同金輅輅頂并圓盤高二尺四寸有奇用抹金銅寶珠頂餘同金輅天輪三層皆紅髹上雕木貼金邊

耀葉六十三片內飾青地雕木五彩雲文三層間繪五  
彩雲襯板六十三片四周黃銅裝釘上施紅綺瀝水三  
層每層八十一摺繡瑞草文前垂青綺絡帶二俱繡升  
龍五彩雲文圓盤四角連絡座板用攀頂紅線圓條四  
并紅髹木魚亭前後闌干同金輅左右闌干各一扇內  
嵌條環板皆紅髹計十四柱柱首雕木紅蓮花線金青  
綠裝蓮花抱柱前闌干內布花毯紅旗二與金輅所樹  
同竿上祇垂紅纓五其踏梯行馬之屬亦同金輅帳房

用綠色螭頭餘與東宮同

親王妃車亦曰鳳轎小轎制俱同東宮妃惟鳳轎衣用木紅平羅小轎衣二一用礬紅素紵絲一用木紅平羅行障坐障制同東宮妃

公主車宋用厭翟車明初因之其後定制鳳轎行障坐障如親王妃

皇孫車永樂中定皇太孫婚禮儀仗如親王降皇太子一等而用象輅

郡王無輅祇有帳房制同親王

郡王妃及郡主俱用翟輅制與皇妃鳳輅同第易鳳為翟行障坐障同親王妃而繪雲翟文

百官乘車之制洪武元年令凡車不得雕飾龍鳳文職官一品至三品用簡金飾銀螭繡帶青縵四品五品素獅頭繡帶青縵六品至九品用素雲頭青帶青縵輅同車制庶民車及輅並用黑油齊頭平頂阜縵禁用雲頭六年令凡車輅禁丹漆五品以上車止用素縵婦女許

坐轎官民老疾者亦得乘之景泰四年令在京三品以上得乘轎宏治七年令文武官例應乘轎者以四人舁之其五府管事內外鎮守守備及公侯伯都督等不問老少皆不得乘轎違例乘轎及擅用八人者奏聞蓋自太祖不欲勲臣廢騎射雖上公出必乘馬永樂元年駙馬都尉胡觀越制乘晉王濟熺朱轎棧轎為給事中周景所劾有詔宥觀而賜濟熺書切責之惟文職大臣乘轎庶官亦乘馬又文臣皆許乘車大臣得乘安車後久

廢不用正德四年禮部侍郎劉機言大明集禮公卿大臣得乘安車因請定轎扇繖蓋品級等差帝以京城內安車繖蓋久不行却其請而命轎扇俱如例行嘉靖十五年禮部尚書霍韜言禮儀定式京官三品以上乘轎邇者文官皆用肩輿或乘女轎乞申明禮制俾臣下有所遵守乃定四品下不許乘轎亦毋得用肩輿隆慶二年給事中徐尚劾應城伯孫文棟等乘轎出入驕僭無狀帝命奪文棟等俸乃諭兩京武職非奉特恩不許乘

轎文官四品以下用帷輪者禁如例萬厯三年奏定勲戚及武臣不許用帷轎肩輿并交牀上馬至若破格殊典則宣德中少保黃淮陪遊西苑嘗乘肩輿入禁中嘉靖間嚴嵩奉詔苑直年及八旬出入得乘肩輿武臣則郭勛朱希忠特命乘肩輿扈南巡蹕後遂賜常乘焉皆非制也

繖蓋之制洪武元年令庶民不得用羅絹涼繖但許用油紙雨繖三年令京城內一品二品用繖蓋其餘用雨

繖十六年令尚書侍郎左右都御史通政使太常卿應天府尹國子祭酒翰林學士許張繖蓋二十六年定一品二品繖用銀浮屠頂三品四品用紅浮屠頂俱用黑色茶褐羅表紅絹裏三簷雨繖用紅油絹五品紅浮屠頂青羅表紅絹裏兩簷雨繖同四品六品至九品用紅浮屠頂青絹表紅絹裏兩簷雨繖俱用油紙三十五年官員繖蓋不許用金繡朱丹裝飾公侯駙馬伯與一品二品同成化九年令兩京官遇雨任用油繖其涼繖不



許張於京城

鞍轡之制洪武六年令庶民不得描金惟銅鐵裝飾二十六年定公侯一品二品用銀鍍鐵事件鞬用描銀三品至五品用銀鍍鐵事件鞬用油畫六品至九品用擺錫鐵事件鞬用油畫三十五年官民人等馬額下纓并鞬轡俱用黑色不許紅纓及描金嵌金天青朱紅裝飾軍民用鐵事件黑綠油鞬

明史卷六十五

欽定四庫全書

史部  
明史卷六十八至

內閣中書臣瞿瞿照覆勘

總校官編修臣朱 鈐

欽定四庫全書

明史卷六十六

大學士張廷玉等奉 敕修

志第四十二

輿服二

皇帝冕服

后妃冠服

皇太子親王以下冠服

皇帝冕服洪武元年學士陶安請製五冕太祖曰此禮

太繁祭天地宗廟服袞冕社稷等祀服通天冠絳紗袍  
餘不用三年更定正旦冬至聖節並服袞冕祭社稷先  
農冊拜亦如之十六年定袞冕之制冕前圓後方元表  
纁裏前後各十二旒旒五采玉十二珠五采纁十有二  
就就相去一寸紅絲組為纓黼纁充耳玉簪導袞元衣  
黃裳十二章日月星辰山龍華蟲六章織於衣宗彝藻  
火粉米黼黻六章繡於裳白羅大帶紅裏蔽膝隨裳色  
繡龍火山文玉革帶玉佩大綬六采赤黃黑白縹綠小

綬三色同大綬間施三玉環白羅中單蔽領青綠襪黃  
鞵黃金烏飾二十六年更定袞冕十二章冕版廣一尺  
二寸長二尺四寸冠上有覆元表朱裏餘如舊制圭長  
一尺二寸袞元衣纁裳十二章如舊制中單以素紗為  
之紅羅蔽膝上廣一尺下廣二尺長三尺織火龍山三  
章革帶佩玉長三尺三寸大帶素表朱裏兩邊用緣上  
以朱錦下以綠錦大綬六采黃白赤  
元纁綠織成純元質五百  
首凡合單紉為一系四系  
為一扶五扶為一背小綬三色同大綬間織三玉

環朱韞赤舄永樂三年定冕冠以皁紗為之上覆曰緹桐板為質衣之以綺元表朱裏前圓後方以玉衡維冠

玉簪貫紐紐與冠武

足前體下曰武綬在冠之下亦曰武

并繫纓處皆飾

以金緹以左右垂黼纁充耳

用黃玉

繫以元統承以白玉

瑱朱紘餘如舊制玉圭長一尺二寸剡其上刻山四以

象四鎮之山蓋周鎮圭之制異於大圭不瑑者也以黃

綺約其下別以囊韜之金龍文袞服十有二章元衣八

章日月龍在肩星辰山在背火華蟲宗彝在袖

每袖各三

皆

織成本色領標襖裾

標者袖端  
襖者衣緣

纁裳四章織藻粉米黼

黻各二前三幅後四幅前後不相屬共腰有辟積本色

綈裼

裳側有純謂之綈裳下有純謂之裼純者緣也

中單以素紗為之青領標

襖裾領織黻文十三蔽膝隨裳色四章織藻粉米黼黻

各二本色緣有紃施於縫中玉鉤二玉佩二各用玉珩

一瑀一琕二衝牙一璜二瑀下垂玉花一玉滴二瑑飾

雲龍文描金自珩而下繫組五貫以玉珠行則衝牙二

滴與璜相觸有聲金鉤二有二小綬六采

黃白赤  
元纁綠

纁質



三小綬色同大綬間施三玉環龍文皆織成韞舄皆赤  
色舄用黑鉤純以黃飾舄首嘉靖八年諭閣臣張璁袁  
冕有革帶今何不用璁對曰按陳祥道禮書古革帶大  
帶皆謂之鞶革帶以繫佩韞然後加以大帶而笏搢於  
二帶之間夫革帶前繫韞後繫綬左右繫佩自古冕弁  
恒用之今惟不用革帶以至前後佩服皆無所繫遂附  
屬裳要之間失古制矣帝曰冕服祀天地享祖宗若闕  
革帶非齊明盛服之意及觀會典載蔽膝用羅上織火

山龍三章并大帶緣用錦皆與今所服不合卿可并革帶繫蔽膝佩綬之式詳考繪圖以進又云衣裳分上下服而今衣恒掩裳裳制如帷而今兩幅朕意衣但當與裳要下齊而露裳之六章何如已又諭璫以變更祖制為疑璫對曰臣考禮制衣不掩裳與聖意允合夫衣六章裳六章義各有取衣自不容掩裳大明集禮及會典與古制不異今衣八章裳四章故衣常掩裳然於典籍無所準內閣所藏圖註蓋因官司織造循習訛謬今訂

正之乃復祖制非有變更帝意乃決因復諭璉曰衣有  
六章古以繪今當以織朕命織染局考國初冕服日月  
各徑五寸當從之裳六章古用繡亦當從之古色用元  
黃取象天地今裳用纁於義無取當從古革帶即束帶  
後當用玉以佩綬繫之於下蔽膝隨裳色其繡上龍下  
火可不用山卿與內閣諸臣同考之於是楊一清等詳  
議袞冕之服自黃虞以來元衣黃裳為十二章日月星  
辰山龍華蟲其序自上而下為衣之六章宗彝藻火粉

米黼黻其序自下而上為裳之六章自周以後浸變其制或八章或九章已戾於古矣我太祖皇帝復定為十二章之制司造之官仍習舛訛非制作之初意伏乞聖斷不疑帝乃令擇吉更正其制冠以圓匡烏紗冒之旒綴七采玉珠十二青纁充耳綴玉珠二餘如舊制元衣黃裳衣裳各六章洪武間舊制日月徑五寸裳前後連屬如帷六章用繡蔽膝隨裳色羅為之上繡龍一下繡火三繫於革帶大帶素表朱裏上緣以朱下以綠革帶

前用玉其後無玉以佩綬繫而掩之中單及圭俱如永樂間制朱韞赤舄黃條緣元纓結

皇帝通天冠服洪武元年定郊廟省牲皇太子諸王冠婚醮戒則服通天冠絳紗袍冠加金博山附蟬十二首施朱翠黑介幘組纓玉簪導絳紗袍深衣製白紗內單阜領襖襪裾絳紗蔽膝白假帶方心曲領白韞赤舄其革帶佩綬與衰服同

皇帝皮弁服朔望視朝降詔降香進表四夷朝貢外官

朝覲策士傳臚皆服之嘉靖以後祭太歲山川諸神亦服之其制自洪武二十六年定皮弁用烏紗冒之前後各十二縫每縫綴五采玉十二以為飾玉簪導紅組纓其服絳紗衣蔽膝隨衣色白玉佩革帶玉鉤鐔緋白大帶白韞黑舄永樂三年定皮弁如舊制惟縫及冠武弁貫簪繫纓處皆飾以金玉圭長如冕服之圭有脊并雙植文絳紗袍本色領襟襖裾紅裳但不織章數中單紅領襟襖裾餘俱如冕服內制

皇帝武弁服明初親征遣將服之嘉靖八年諭閣臣張  
璉云會典紀親征類禡之祭皆具武弁服不可不備璉  
對周禮有韋弁謂以韎韋為弁又以為衣裳國朝視古  
損益有皮弁之制今武弁當如皮弁但皮弁以黑紗冒  
之武弁當以絳紗冒之隨具圖以進帝報曰覽圖有韎  
形但無繫處冠制古象上尖今皮弁則圓朕惟上銳取  
其輕利當如古制又衣裳韎烏皆赤色何謂且佩綬俱  
無於祭用之可乎璉對自古服冕弁俱用革帶以前繫

黻後繫綬韋弁之韠正繫於革帶耳武事尚威烈故色純用赤帝復報璫冠服衣裳韠烏俱如古制增革帶佩綬及圭乃定制弁上銳色用赤上十二縫中綴五采玉落落如星狀黹衣黹裳黹鞬俱赤色佩綬革帶如常制佩綬及黹鞬俱上繫於革帶烏如裳色玉圭視鎮圭差小剡上方下有篆文曰討罪安民

皇帝常服洪武三年定烏紗折角向上巾盤領窄袖袍束帶間用金琥珀透犀永樂三年更定冠以烏紗冒之



折角向上其後名翼善冠袍黃盤領窄袖前後及兩肩  
各織金盤龍一帶用玉韉以皮為之先是洪武二十四  
年帝微行至神樂觀見有結網巾者翼日命取網巾頒  
示十三布政使司人無貴賤皆裹網巾於是天子亦常  
服網巾又會典載皇太孫冠禮有云掌冠跪加網巾而  
皇帝皇太子冠服俱闕而不載嘉靖七年更定燕弁服  
初帝以燕居冠服尚沿習俗諭張璁考古帝王燕居法  
服之制璁乃采禮書元端深衣之文圖註以進帝為參

定其制諭璉詳議璉言古者冕服之外元端深衣其用最廣元端自天子達於士國家之命服也深衣自天子達於庶人聖賢之法服也今以元端加文飾不易舊制深衣易黃色不離中衣誠得帝王損益時中之道帝因諭禮部曰古元端上下通用今非古人比雖燕居宜辨等威因酌古制更名曰燕弁寓深宮獨處以燕安為戒之意其制冠匡如皮弁之制冒以烏紗分十有二瓣各以金線壓之前飾五采玉雲各一後列四山朱條為組

纓雙玉簪服如古元端之制色元邊綠以青兩肩繡日月前盤圓龍一後盤方龍二邊加龍文八十一領與兩祛共龍文五九袷同前後齊共龍文四九襯用深衣之制色黃袂圓祛方下齊負繩及踝十二幅素帶朱裏青表綠緣邊腰圍飾以玉龍九元履朱緣紅纓黃結白韞皇后冠服洪武三年定受冊謁廟朝會服禮服其冠圓匡冒以翡翠上飾九龍四鳳大花十二樹小花數如之兩博鬢十三鈿褱衣深青繪翟赤質五色十二等素紗

中單敝領朱羅縠標襪裾蔽膝隨衣色以緞為領緣用  
翟為章三等大帶隨衣色朱裏紕其外上以朱錦下以  
綠錦紐約用青組玉革帶青鞵青舄以金飾永樂三年  
定制飾翠龍九金鳳四中一龍銜大珠一上有翠蓋下  
垂珠結餘皆口銜珠滴珠翠雲四十片大珠花小珠花  
數如舊三博鬢飾以金龍翠雲皆垂珠滴翠口圈一副  
上飾珠寶鈿花十二翠鈿如其數托裏金口圈一副珠  
翠面花五事珠排環一對阜羅額子一描金龍文用珠

二十一翟衣深青織翟文十有二等間以小輪花紅領  
標襖裾織金雲龍文中單玉色紗為之紅領標襖裾織  
黻文十三蔽膝隨衣色織翟為章三等間以小輪花四  
以緞為領緣織金雲龍文玉黻圭長七寸剡其上琢穀  
文黃綺約其下韜以黃囊金龍文玉革帶青綺鞶描金  
雲龍文玉事件十金事件四大帶表裏俱青紅相半末  
純紅下垂織金雲龍文上朱緣下綠緣青綺副帶一綬  
五采黃赤白縹綠纁質間施二玉環皆織成小綬三色

同大綬玉佩二各用玉珩一瑀一琚二衝牙一璜二瑀  
下垂玉花一玉滴二瑑飾雲龍文描金自珩而下繫組  
五貫以玉珠行則衝牙二滴與二璜相觸有聲上有金  
鈎有小綬五采以副之纁質織成青韞舄飾以描金雲  
龍阜純每舄首加珠五顆

皇后常服洪武三年定雙鳳翊龍冠首飾釧鐲用金玉  
珠寶翡翠諸色團衫金繡龍鳳文帶用金玉四年更定  
龍鳳珠翠冠真紅大袖衣霞帔紅羅長裙紅褙子冠制

如特髻上加龍鳳飾衣用織金龍鳳文加繡飾永樂三  
年更定冠用皐穀附以翠博山上飾金龍一翊以珠翠  
鳳二皆口銜珠滴前後珠牡丹二花八蕊翠葉三十六  
珠翠穠花鬢二珠翠雲二十一翠口圈一金寶鈿花九  
飾以珠金鳳二口銜珠結三博鬢飾以鸞鳳金寶鈿二  
十四邊垂珠滴金簪二珊瑚鳳冠簪一副大彩霞帔衫  
黃霞帔深青織金雲霞龍文或繡或鋪翠圈金飾以珠  
玉墜子琢龍文四袂襖子

即襟子

深青金繡團龍文鞠衣

紅色前後織金雲龍文或繡或鋪翠圈金飾以珠大帶  
紅綾羅為之有緣餘或青或綠各隨鞠衣色緣襪襖子  
黃色紅領襹襪裾皆織金采色雲龍文緣襪裾紅色綠  
緣襪織金采色雲龍文玉帶如翟衣內制第減金事件  
一玉花采結綬以紅綠綾羅為結玉綬花一瑑雲龍文  
綬帶玉墜珠六金垂頭花辦四小金葉六紅綾羅繫帶  
一白玉雲樣玳瑁二如佩制有金鉤金如意雲蓋一下  
懸紅組五貫金方心雲板一俱釵雲龍文襯以紅綺下



垂金長頭花四中小金鐘一末綴白玉雲朶五青鞵烏  
與翟衣內制同

皇妃皇嬪及內命婦冠服洪武三年定皇妃受冊助祭  
朝會禮服冠飾九翬四鳳花釵九樹小花數如之兩博  
鬢九釵翟衣青質繡翟編次於衣及裳重為九等青衫  
中單黻領朱縠標襖裾蔽膝隨裳色加文繡重雉為章  
二等以緞為領緣大帶隨衣色玉革帶青鞵烏佩綬常  
服鸞鳳冠首飾釧鐲用金玉珠寶翠諸色團衫金繡鸞

鳳不用黃帶用金玉犀又定山松特髻假鬢花鈿或花  
釵鳳冠真紅大袖衣霞帔紅羅裙褙子衣用織金及繡  
鳳文永樂三年更定禮服九翟冠二以皐穀為之附以  
翠博山飾大珠翟二小珠翟三翠翟四皆口銜珠滴冠  
中寶珠一座翠頂雲一座其珠牡丹翠釵花鬢之屬俱  
如雙鳳翊龍冠制第減翠雲十又翠牡丹花釵花各二  
面花四梅花環四珠環各二其大衫霞帔燕居佩服之  
飾俱同中宮第織金繡琢俱雲霞鳳文不用雲龍文九

嬪冠服嘉靖十年始定冠用九翟次皇妃之鳳大衫鞠衣如皇妃制圭用次玉穀文內命婦冠服洪武五年定三品以上花釵翟衣四品五品山松特髻大衫為禮服貴人視三品以皇妃燕居冠及大衫霞帔為禮服以珠翠慶雲冠鞠衣褙子緣襖襖裙為常服

宮人冠服制與宋同紫色團領窄袖偏刺折枝小葵花以金圈之珠絡縫金帶紅裙弓樣襪上刺小金花烏紗帽飾以花帽額綴團珠結珠鬢梳垂珠耳飾

皇太子冠服陪祀天地社稷宗廟及大朝會受冊納妃  
則服袞冕洪武二十六年定袞冕九章冕九旒旒九玉  
金簪導紅組纓兩玉珎圭長九寸五分元衣纁裳衣五  
章織山龍華蟲宗彝火裳四章織藻粉米黼黻白紗中  
單黻領蔽膝隨裳色織火山二章革帶金鉤鐔玉佩綬  
五采赤白元  
纁綠織成純赤質三百三十首小綬三色同間  
織三玉環大帶白表朱裏上緣以紅下緣以綠白韞赤  
舄永樂三年定冕冠元表朱裏前圓後方前後各九旒

每旒五采繅九就貫五采玉九赤白青黃黑相次玉衡  
金簪元紃垂青纁充耳

用青玉

承以白玉璵朱紘纓玉圭

長九寸五分以錦約其下并韜袞服九章元衣五章龍  
在肩山在背火華蟲宗彝在袖

每袖各三

皆織成本色領標

襜褕纁裳四章織藻粉米黼黻各二前三幅後四幅不  
相屬共腰有襍積本色縹裼中單以素紗為之青領標  
襜褕領織黻文十二蔽膝隨裳色四章織藻粉米黼黻  
本色緣有紃施於縫中上玉鉤二玉珣二各用玉珩一

璃一琚一衝牙一璜三璃下垂玉花一玉滴二瑒雲龍

文描金自珩而下繫組五貫以玉珠上有金鉤小綬四

采

赤白  
縹綠

以副之纁質大帶素表朱裏在腰及垂皆有綈

上綈以朱下綈以綠紐約用青組大綬四采

赤白  
縹綠

纁質

小綬三采間施二玉環龍文皆織成鞞舄皆赤色舄用

黑鈎純黑飾舄首朔望朝降詔降香進表外國朝貢朝

覲則服皮弁永樂三年定皮弁冒以烏帽前後各九縫

每縫綴五采玉九縫及冠武弁貫簪繫纓處皆飾以金

金簪朱纓玉圭如冕服內制絳紗袍本色領襖襪裾紅裳如冕服內裳制但不織章數中單以素紗為之如深衣制紅領襖襪裾領織黻文十一章蔽膝隨裳色本緣有紃施於縫中其上玉鉤二玉佩如冕服內制但無雲龍文有小綬四采以副之大帶大綬鞶烏赤色皆如冕服內制其常服洪武元年定烏紗折上巾永樂三年定冠烏紗折角向上巾

亦名翼善冠親王郡王及世子俱同

袍赤盤領窄袖

前後及兩肩各金織盤龍一玉帶鞶以皮為之

皇太子妃冠服洪武三年定禮服與皇妃同永樂三年  
更定九翬四鳳漆竹絲為匡冒以翡翠上飾翠翬翬九  
金鳳四皆口銜珠滴珠翠雲四十片大珠花九樹小珠  
花數如之雙博鬢飾以鸞鳳皆垂珠滴翠口圈一副上  
飾珠寶鈿花九翠鈿如其數托裏金口圈一副珠翠而  
花五事珠排環一對珠阜羅額子一描金鳳文用珠二  
十一翟衣青質織翟文九等間以小輪花紅領襖襖裾  
織金雲龍文中單玉色紗為之紅領襖襖裾領織黻文



十一蔽膝隨衣色織翟為章二等間以小輪花三以緞  
為領緣織金雲鳳文其玉圭帶綬玉佩鞶烏之制俱同  
皇妃洪武三年又定常服犀冠刻以花鳳首飾釧鐲衫  
帶俱同皇妃四年定冠亦與皇妃同永樂三年定燕居  
冠以皁縠為之附以翠博山上飾寶珠一座翊以二珠  
翠鳳皆口銜珠滴前後珠牡丹二花八蕊翠葉三十六  
珠翠穰花鬢二珠翠雲十六片翠口圈一副金寶鈿花  
九上飾珠九金鳳一對口銜珠結雙博鬢飾以鸞鳳金

寶鈿十八邊垂珠滴金簪一對珊瑚鳳冠背一副其大衫霞帔燕居佩服之飾俱同皇妃

親王冠服助祭謁廟朝賀受冊納妃服袞冕朔望朝降詔降香進表四夷朝貢朝覲服皮弁洪武二十六年定冕服俱如東宮第冕旒用五采玉圭長九寸二分五釐青衣纁裳永樂三年又定冕服皮弁制俱與東宮同其常服亦與東宮同嘉靖七年諭禮部朕仿古元端自為燕弁冠服更制忠靜冠服錫於有位而宗室諸王制猶

未備今酌燕弁及忠靜冠之制復為式具圖命曰保和冠服自郡王長子以上其式已明鎮國將軍以下至奉國中尉及長史審理紀善教授伴讀俱用忠靜冠服依其品服之儀賓及餘官不許繫服夫忠靜冠服之異式尊賢之等也保和冠服之異式親親之殺也等殺既明庶幾乎禮之所保保斯和和斯安此錫名之義也其以圖說頒示諸王府如敕遵行保和冠制以燕弁為準用九袞去簪與五玉後山一扇分畫為四服青質青緣前

後方龍補身用素地邊用雲襯用深衣玉色帶青表綠裏綠緣履用阜綠結白韞

親王妃冠服受冊助祭朝會服禮服洪武三年定九翬四鳳冠永樂三年又定九翟冠制同皇妃其大衫霞帔燕居佩服之飾同東宮妃第金事件減一玉綬花塚寶相花文

公主冠服與親王妃同惟不用圭

親王世子冠服聖節千秋節并正旦冬至進賀表箋及

父王生日諸節慶賀皆服袞冕洪武二十六年定袞冕  
七章冕三采玉珠七旒圭長九寸青衣三章織華蟲火  
宗彝纁裳四章織藻粉米黼黻素紗中單青領襪赤韍  
革帶佩白玉元組綬綬紫質用三采

紫黃赤

織成間織三

白玉環白韍赤舄永樂三年更定冕冠前後各八旒每  
旒五采纁八就貫三采玉珠八赤白青色相次玉圭長  
九寸青衣三章火在肩華蟲宗彝在兩袖皆織成本色  
領標襪裾其纁裳玉佩帶綬之制俱與親王同第領織

黻文減二皮并用烏紗冒之前後各八縫每縫綴三采玉八餘制如親王其圭佩帶綬韞舄如冕服內制常服亦與親王同嘉靖七年定保和冠服以燕弁為準用八袂去簪玉後山以一扇分畫為四服與親王同

世子妃冠服永樂三年定與親王妃同惟冠用七翟

郡王冠服永樂三年定冕冠前後各七旒每旒五采縹七就貫三采玉珠七圭長九寸青衣三章粉米在肩藻宗彝在兩袖皆織成纁裳二章織黼黻各二中單領織

黻文七餘與親王世子同皮弁前後各七縫每縫綴三  
采玉七餘與親王世子同其圭佩帶綬鞶舄如冕服內  
制常服亦與親王世子同嘉靖七年定保和冠服冠用  
七襖服與親王世子同

郡王妃冠服永樂三年定冠用七翟與親王世子妃同  
其大衫霞帔燕居佩服之飾俱同親王妃第繡雲霞翟  
文不用盤鳳文

郡王長子朝服七梁冠大紅素羅衣白素紗中單大紅

素羅裳及蔽膝大紅素羅白素紗二色夾帶玉朝帶丹  
礬紅花錦錦雞綬玉佩象笏白絹鞵皐皮雲頭履鞵公  
服皐縐紗幘頭大紅素紵絲衣玉革帶常服烏紗帽大  
紅紵絲織金獅子開襖圓領玉束帶皐皮銅線鞵其保  
和冠如忠靜之制用五襖服與郡王同補子用織金方  
龍

郡主冠服永樂三年定與郡王妃同惟不用圭減四珠  
環一對



郡王長子夫人冠服珠翠五翟冠大紅紵絲大衫深青紵絲金繡翟褙子青羅金繡翟霞帔金墜頭

鎮國將軍冠服與郡王長子同鎮國將軍夫人冠服與郡王長子夫人同輔國將軍冠服與鎮國將軍同惟冠六梁帶用犀輔國將軍夫人冠服與鎮國將軍夫人同惟冠用四翟抹金銀墜頭奉國將軍冠服與輔國將軍同惟冠五梁帶用金銀花常服大紅織金虎豹奉國將軍淑人冠服與輔國將軍夫人同惟褙子霞帔金繡孔

崔文鎮國中尉冠服與奉國將軍同惟冠四梁帶用素  
金佩用藥玉鎮國中尉恭人冠服與奉國將軍淑人同  
輔國中尉冠服與鎮國中尉同惟冠三梁帶用銀釵花  
綬用盤雕公服用深青素羅常服紅織金熊羆輔國中  
尉宜人冠服與鎮國中尉恭人同惟冠用三翟褙子霞  
帔金繡鴛鴦文銀墜頭奉國中尉冠服與輔國中尉同  
惟冠二梁帶用素銀綬用練鵲幘頭黑漆常服紅織金  
彪奉國中尉安人冠服與輔國中尉宜人同惟大衫用

丹礬紅褙子霞帔金繡練鵲文

縣主冠服珠翠五翟冠大紅紵絲大衫深青紵絲金繡  
孔雀褙子青羅金繡孔雀霞帔抹金銀墜頭郡君冠服  
與縣主同惟冠用四翟褙子霞帔金繡鴛鴦文縣君冠  
服與郡君同惟冠用三翟鄉君冠服與縣君同惟大衫  
用丹礬紅褙子霞帔金繡練鵲文

明史卷六十六